

AKASHVANI AIZAWL
REGIONAL NEWS UNIT

CM

Chief Minister Pu Lalduhoma chuan ramín hma a sawn zel a, mipui ten hna an thawh nasat tawh avangín an hun awl neih ang nuam taka hman a duh chho ve mek niin a sawi.

Nimin khan Pu Lalduhoma hian Sakawrtuichhuna awm H&B Water Park a hawng a, chief mnister chuan India Hmarchhaka Water Park lian ber dawttu ni phak khawpa lian leh tha Hminga & Bawli Water Park hawn a ni thei ta chu lawmawm a tih thu a sawi a. State dangah chauh awm tura ngaih deuh thin, mi tam takín an tu leh fate tlawhpui an chak em em Water Park changtlung tak Mizoramin kan nei ve ta a ni a ti a. Chhungkaw thenkhat phei chuan an tu leh fate state dang Water Park-ah te an hruai hial a. Tunah chuan Mizoram chhungah ngei pan manhla tak a lo awm ta a ni a ti bawk.

Pu Lalduhoma chuan, ramín hma a sawn zel a, mipuítén hna an thawk nasa tial tial a, an hunawl neih chhunte nuam taka hman an duh ni a tam tial tial. Chutiang mamawh nia pan nahawm tak tur nia a hriat thu sawiin hetiang hmun buatsaih nachang hria an awm chu an bengvar a tih thu a sawi bawk.



MIRSO

Mizoram Rubber Society-MIRSO chuan CM Rubber Mission Awareness campaign leh monitoring beihpui neiin Mamit leh Kolasib District a khaw hrang hrang an tlawh mek.

Mizoram Rubber Society tarlan danin, Chief Minister Pu Lalduhoma kaihhruai ZPM sorkar in an manifesto-a an ziah angin, CM Rubber Mission chu District pahnih Mamit leh Kolasib a khaw 24-ah chak taka kalpui niin, Rubber chi tha RRIM 600 chu chhungkaw 1000 hnenah a thlawn a supply in an huanah an phun fel vek tawh an ti a, Sorkar chuan kum 5 chhungin Rubber kung Nuai 51, sing 7, sang 5 chu kuthnathawktu chhungkaw 11,500 pek tur a ruahmanin, kum 4 chhung sorkarin a enkawlpuí zui dawn bawk tih an tarlang a, Kuthnathawktute dawm kan nana Pu Lalduhoma’n Chief Minister’s Rubber Mission a ruahman chu a hlu an tih thu leh project lo awm tawh zawng zawngte thlirletin kuthnathaktute dawm kan nan hetiang tluka project tha a la awm ngai lo niin an sawi bawk.



I DAY FOOTBALL

India ramin zalenna a hmuh ni champha Independence Day pualin Mizoram hmun hrang hrangah football inelna butsaih a ni a, nizan khan tournament lian ber chu Aizawla Rajiv Gandhi Stadium-ah khelh zawh a ni.

Independence Day Men's Football Tournament hi chief minister hlui Pu Lal Thanhawla chuan a hmunah a en a, Mizoram Football Association president hmasa ber ni bawk Pu Lal Thanhawla hian champion Chanmari FC hnenah lawmman a hlan a. Sports Minister Pu Lalnghinglova Hmar chuan a tel pui bawk.

Final inkhelah hian Chanmari chuan Saikhamakawn chu si khat faiin an hneh a, goal awmchhun hi KC Malsawmsanga'n minute 90-naa a khung niin an chak pui a ni.

(Voice Cast)

(Kumin Independence Day pual hian Aizawlah chuah ni loin District hrang hrangah pawh football inelna hi buatsaih a ni a. Mizoram khawpui ber Aizawlah hian hmeichhia leh veteran tan pawh buatsaih a ni bawk a, hmeichhe inelna hi college anga kalpui niin Pachhunga University College chuan Hrangbana College chu si khat faia hnehin an champion a, kum 40 chunglam inelnaah Ditea's FC chuan Ramhlun United chu si thum faia hnehin an champion ve bawk a ni.)



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar puan leh a ni ang.



CHAWNGTLAI TOMATO

Chawngtlai khua chuan tunhnai thla 3 chhungin tomato quintal 976.81 an thar.

Chawngtlai Tomato Grower's Association SEcretary Pu R Biakhminglana sawi danin kumin May atanga July thla chhung khan tomato 976.81 qtls an hralh a, tomato hi grade hnihah then niin, Grade A – quintal 864 leh Grade B – quintal 112 hralh chhuah a ni a, tomato hralhna atang hian cheng nuai 42 chuang an la lut tawh a, Kumina tomato an hralhna rate hi a hniam lai berin kg khat Rs. 40/- niin a san lai berin Rs. 80/- a ni.

Tun dinhmunah Chawngtlai khuaa tomato ching chhungkaw zingah hian Chawngtlai Tomato Grower's Association-a tel hi chhungkaw 103 an awm mek a,

kumin kum tir lama tomato an chinte hralh tur la awm bawk mah se, kum tawp lama thar tur an phun chho leh mek a ni.

Chawngtlai khua hian nikum 2024 chhung khan tomato quintal 4672 an thar a, an tomato thar atang hian cheng nuai 57 zet an la lut a. Kumin 2025 chhung hian an tomato te tha taka an thar thei a ni chuan cheng nuai 80 man vel thar chhuah theih an inbeisei a ni.



DRUGS SEIZED

Central YMA chuan kar hmasa chhung khan Heroin hawng 43 an man a, hemi kaihhnawihah hian mi 56 man an ni bawk.

Central YMA hnuaia CADS chuan August ni 9 leh August ni 15 inkar khan No. 4 : Hawng - 43, Tictac bur – 33, a sen chi bottle 16 leh damdawi thahnem tak bakah Ganja kg 2 leh gram 31 bakah Ruihhlo kaihhnawihah hian mi 56 an man tel a, Counselling mi 28 hnenah pek niin Excise and Narcotics kutah mi 6 hlan an ni bawk.



MAHARASHTRA MUD SLIDE

Mumbai khawpui bul Vikhroli vengah tukin dar 2 vel khan leiminin in pakhat a chhilh a, mi 2 an thih bakah midang 2-in hliam an tuar a ni.

Hliamte hi damdawi inah enkawl an ni a, an ngaihtuahawm loh nia sawi a ni.

